

宋

史

四十



志卷第一百五

宋史一百五十二

開府儀同三司上柱國錄軍國重事前書局丞相監修國史領經選事都總裁臣脫脫等奉

敕修

輿服四 諸臣服上

諸臣祭服唐制有袞冕九旒鷩冕八旒毳冕七旒綺冕六旒玄冕五旒宋初省八旒六旒冕九旒冕塗金銀花額犀玳瑁簪導青羅衣綉山龍雉火虎雉五章緋羅裳繡藻粉米黼黻四章緋縠膝繡山火二章白花羅中單玉裝劒佩革帶暈錦綬二玉環緋白羅大帶緋羅韁履親王中書門下奉祀則服之其冕無額花者玄衣纁裳悉畫小白綾中

單師子錦綬二銀環餘同上三公奉祀則服之七旒冕犀
角簪導衣畫虎雖粉米三章裳畫黼黻二章銀裝佩劒革
帶餘同九旒冕九卿奉祀則服之五旒冕青羅衣裳無章
銅裝佩劒革帶餘同七旒冕四品五品為獻官則服之六
品以下無劒佩綬紫檀衣朱裳羅為之阜大綾綬銅裝劒
佩御史博士服之平冕無旒青衣纁裳無劒佩綬餘同五
旒冕大祝奉禮服之慶曆三年太常博士余靖言周禮司
服之職掌王之吉服大裘而冕無旒以祀昊天上帝祀五
帝亦如之裘冕十有二旒其服十有二章以享先王鷩冕
八旒其服七章以享先公亦以饗射毳冕七旒其服五章

以祀四望山川繩冕六旒其服三章以祭社稷五祀玄冕
五旒其服無章以祭小祀此皆天子親行祠事所服冕服
悉因所祀大小神鬼以為制度今大祠中祠所遣獻官並
用上公九旒九章冕服以為初獻其餘公卿亦皆七旒冕
服全無等降小祠則公服行事乖戾舊典宜詳周禮因所
祭鬼神以為獻官冕服之制詔下禮官議奏曰聖朝之制
唯皇帝親祠郊廟及朝會大禮服袞冕外餘冕皆不設其
每歲常祀遣官行事攝公則服一品九旒冕攝卿則服三
品七旒冕自從品制為服不以祠之大小為差至于小祠
獻官舊以公服行事則有違典禮案衣服令五旒冕衣裳

無章阜綾綬銅裘劒佩四品以下為獻官則服之今小祠獻官既不攝公卿則盡屬四品以下當有祭服請除公卿祭服仍舊從本品外小祠所遣獻官並依令文祭服行事若非時告祭用香幣禮器行事之處亦皆準此詔施行焉皇祐四年同知太常禮院邵必言伏見監祭使監禮各冠五旒冕衣裳無章色以紫檀案周禮六冕之制凡有旒者衣裳皆有章惟大裘冕無旒衣裳無章一命大夫之冕無旒衣裳亦無章今監祭監禮所服冕五旒侯伯之冕也而衣無章深所不稱色以紫檀又無經據竊詳監祭監禮旣非祠官則御史博士尔而服用五等蓋非所宜而且有旒

無章況國家南郊大禮太常卿止服朝服前導皇帝明非
祠官也今後監祭者請冠獬豸監禮者冠進賢為稱詔不
允元豐元年詳定禮文所言國家服章視唐尤為不備於
令文祀儀有九旒冕七旒冕五旒冕今既無冕名而有司
仍不制七旒冕乃有四旒冕其非禮尤甚又服之者不必
官秩上下故分獻四品官皆服四旒冕博士御史則冕五
旒而衣紫檀太祝奉禮則服平冕而無佩玉此因循不謹
之失也且古者朝祭異服所以別事神與事君之禮今皇
帝冬至及正旦御殿服通天冠絳紗袍則百官皆服朝服
乃禮之稱至親祠郊廟皇帝嚴裘冕以事神而侍祠之官

止以朝服豈禮之稱哉至於景靈宮分獻官皆服朝服尤
為失禮伏請親祠郊廟景靈宮除導駕贊引扶持宿衛之
官其侍祠及分獻者並服祭服如所考制度修製五冕及
爵弁服各正冕弁之名又國朝祀儀祭社稷朝日夕月風
師雨師皆服袞冕其蜡祭先蠶五龍亦如之祭司命云竈
門厲行皆服鷩冕壽星靈星司中司寒中雷馬祭皆服毳
冕皆非是今天子六服自鷩冕而下既不親祠廢而不用
則諸臣攝事自當從王所祭之服伏請依周禮凡祀四望
山川則以毳冕祭社稷五祀則以絺冕朝夕日月風師雨
師司命司中則以玄冕若七祀蜡祭百神先蠶五龍靈星

壽星司寒馬祭蓋皆群小祀之比當服玄冕從之哲宗元祐元年太常寺言舊制大禮行事執事官並服祭服餘服朝服至元豐七年呂升卿始有行事及陪祠官並服祭服之議今欲令行事執事官並服祭服其贊引行事禮儀使太常卿太常博士閣門使樞密院官進接圭璧中監止供奉皇帝其陪位官止導駕押宿及主管事務并他處行事官仍服朝服從之徽宗大觀元年議禮局言太社太學獻官祝禮皆以法服奉祠至郡邑則用常服乞降祭服詔頒制度於州郡然未明使製造後政和間始詔州縣冠服形制詭異令禮制局造樣頒下轉運司轉運司製以給州縣

焉二年議禮局檢討官俞東言玄以象道纁以象事故凡冕皆玄衣纁裳今太常寺祭服則衣色青矣前三幅以象陽後四幅以象陰故裳制不相連屬今之裳則為六幅而不殊矣冕玄表而朱裏今乃青羅為覆以金銀飾之佩用綬以貫玉今既有玉佩矣又有錦綬以銀銅二環飾之以玉宗彝宗廟之彝也乃為虎雉之狀而不作虎彝雉彝粉米散利以養人也乃分為二章而以五色圓花為藉其餘不合古者甚多乞下禮局博考古制畫太常寺及古者祭服樣二本以進至於損益裁成斷自聖學詔令議禮局詳議四年議禮局官宇文粹中議改衣服制度曰凡冕皆玄

衣纁裳衣則繪而章數皆奇裳則繡而章數皆偶陰陽之
義也今衣用深青非是欲乞視冕之等衣色用玄裳色用
纁以應典禮古者蔽前而已芾存此象以章為之今蔽膝
自一品以下並以緋羅為表緣緋絝為裏無復上下廣狹
及會紩純紩之制又有山火龍章案明堂位有虞氏服較
夏后氏山商火周龍章較者乃黻冕之黻非赤芾之芾也
且芾在下體與裳同用而山龍火者衣之章也周既績於
上衣不應又續於芾請改芾制去山龍火章以破諸儒之
惑又祭服有革帶今不用皮革而通繫以緋羅又以銅為
飾其綬或錦或卓環或銀或銅尤無經據宜依古制除去

至佩玉中單赤鳥之制則全取元豐中詳定官所議行之
粹中又上所編祭服制度曰古者冕以木版為中廣八寸
長尺六寸後方前圓後仰前低染三十升之布玄表朱裏
後方者不變之體前圓者無方之用仰而玄者升而辨於
物俛而朱者降而與萬物相見後世以繒易布故純儉今
群臣冕版長一尺二寸闊六寸二分非古廣尺之制以青
羅為覆以金塗銀稜為飾非古玄表朱裏之制乞下有司
改正古者冕之名雖有五而繩就旒玉則視其命數以為
等差合綵絲為繩用以貫玉謂之繩以一玉為一成結之
使不相并謂之就就間相去一寸則九王者九寸七王者

七寸各以旒數長短為差今群臣之冕用藥玉青珠五色
苴線非藻玉三采二采之義每旒之長各八寸非旒數長
短為差之義又獻官冕服雜以諸侯之制而一品服袞冕
臣竊以為非宜元豐中禮官建言請資政殿大學士以上
侍祠服鷩冕觀察使以上服毳冕監察御史以上服綿冕
朝官以上服玄冕選人以上爵弁詔許之而不用爵弁供
奉官以下至選人盡服玄冕無旒臣竊謂依此參定乃合
禮制古者三公一命袞則三公在朝其服當鷩冕蓋出封
則遠君而伸在朝則近君而屈今之攝事及侍祠皆在朝
之臣也在朝之臣乃與古之出封者同命數非先王之意

乞下有司制鷩冕八旒毳冕六旒緜冕四旒玄冕三旒其
次二旒又其次無旒依元豐詔旨參酌等降為侍祠及攝
祭之服長短之度采色之別皆乞依古制施行又案周禮
諸侯爵有五等而服則三所謂公之服自毳冕而下侯伯
自鷩冕而下子男自毳冕而下是也古者諸侯有君之道
故其服以五七九為節今之郡守雖曰猶古之侯伯其實
皆王臣也欲乞只用群臣之服自鷩冕而下分為三等三
都四輔為一等初獻鷩冕八旒經略安撫鈐轄為一等初
獻毳冕六旒亞獻並玄冕二旒終獻無旒節鎮防團軍事
為一等初獻緜冕四旒亞終獻並玄冕無旒其衣服之制

則各從其冕之等又曰今之紜組仍綴兩繒帶而結於頤
冕旁仍垂青纓而不以瑱以犀爲簪而不以玉笄象笄並
非古制乞下有司改正從之政和議禮局言大觀中所上
群臣祭服制度已依所奏修定乞付有司依圖畫製造既
又上群臣祭服之制正一品九旒冕金塗銀綾有額花犀
簪青衣畫降龍朱裳蔽膝白羅中單大帶革帶玉佩錦綬
青絲網玉環朱轔履革帶以金塗銀玉佩以金塗銀裝綬
以天下樂暉親祠大禮使亞獻終獻太宰少宰左丞每歲
大祠宰臣親王執政官郡王充初獻服之奏告官並依本
品服已下准此從一品九旒冕無額花白綾中單紅錦綬

銀環金塗銀佩餘如正一品服親祠吏部戶部禮部兵部工部尚書太廟進受幣爵奉幣爵宗室每歲大祠捧俎官大祠中祠初獻官服之二品七旒冕角簪青衣無降龍餘如從一品服親祠吏部侍中殿中監大司樂光祿卿讀冊官太廟薦俎贊進飲福宗室七祀配享功臣分獻官每歲大祀謂用宮架者大司樂大祠中祠亞終獻大祠禮官小祠獻官朔祭太常卿服之三品五旒冕阜綾綬銅環金塗銅革帶佩餘如二品服親祠舉冊官大樂令光祿丞奉俎饌豆簠簋官分獻壇壝從祀太廟奉瓊盤薦香燈安奉神主奉毛血槃蕭蒿罿肝腎豆宗室每歲祭祠大

樂令大中祠分獻官服之無旒冕素青衣朱裳蔽膝無佩
綬餘如三品服奉禮協律郎郊社令太祝太官令親祠擡
鼎官進搏黍官太廟供亞終獻金盞供七祀獻官執爵管
服之五旒冕紫檀純衣餘如三品服監察御史服之州郡
祭服三都初獻八旒冕經略安撫銓轄初獻六旒冕亞獻
並三旒冕終獻無旒節鎮防團軍事初獻四旒冕亞終獻
並無旒冕中興之後省九旒七旒五旒冕定爲四等一曰
鷩冕八旒二曰毳冕六旒三曰希冕四旒四曰玄冕無旒
其義以公卿大夫士皆北面爲臣又近尊者而屈故其節
以八以六以四從陰數也先是紹興四年五月國子監丞

王普奏言臣嘗攷諸經傳具得冕服之制蓋王之三公八
命鶩冕八旒衣裳七章其章各八孤卿六命毳冕六旒衣
裳五章其章各六大夫四命希冕四旒衣裳三章其章各
四上士三命玄冕三旒中士再命玄冕二旒下士一命玄
冕無旒衣皆無章裳較視其命數自三而下其繅至笄衡
絃紱瑱纊帶佩芾舄中衣皆有等差近世冕服制度沿襲
失真多不如古夫後方而前圓後昂而前俛玄表而朱裏
此冕之制也今則方圓俛仰幾於無辨且以青爲表而飾
以金銀矣其衣皆玄其裳皆纁裳前三而後四幅此衣裳
之制也今則衣色以青裳色以緋且以六幅而不殊矣山